



partii naleraq

UPA2016/63

Per Rosing-Petersen

Nammisornersorlutik Oqartussat kommunillu Danmarkimi nunanilu allani kiffartuussinernut atatillugu aningaasartuutigisartagaasa Naalackersuisut UKA 2017-mut misissuineramik saqqummiussinissamik suliniuteqaqqullugit inatsisartut aalajangiiffigisassaattut siunnersuut. Misissuinermi aamma innersuussutit qanoq ililluni nunatsinni kifartuussinerit atorluarneqarnerusinnaanerit, taamaalilluni nunatta avataaniit kiffartuussinerit annikillissarnissaat anguneqaqqullugu.

(Inatsisartunut ilaasortaq Anthon Frederiksen, Partii Naleraq)

Qinersinissarli sioqqullugu Partii Naleqqamiit eqqartulerparput nunatsinni killiffippit eqqarsaatigalugu aamma aningaasartuuteqariaatsitta iluani annertuumik aqqissuusseqqittariaqalivissugut. Uanilu Anthon Frederiksenip Partii Naleqqameersup assortugassaangitsumik tamassumap pingaarnert ilaa siunnersuummini qaqippaa, taamaattumik qujaffigerusupparput taamaattumik pingaarutilimmik inatsisartunut aalajangiiffigisassanngortitsimmat.

Aningaasartuuteqariaaserput sukumiilluinnartumik aqqissuussiffigisariaqarpoq sorpassuartigut, nalilersortariaqarparpullu aningaasat atukkatta naammassisamut naapertuunnersut imaluunniit akisunaarlugu angusaqarnersugut. Tassalu aqqitassatta qitia, siunnersuummilu aamma toqqammaveqartoq. Sorpassuit, nioqqutissaannaangitsut aningasarpassuit atorlugit nunatsinnut eqqussorpagut, aamma kiffartuussinermut tunngasut, soorlu sillimmasiisarnert, siunnersortit ilaalu ilanngullugit. Ukiunimi kingullerni siunnersortiinnarnut ukiumut 200 miliuunit angullugit allaat aningaasartuuteqartalernikuuvugut –taakku inuiaqatigiinnut malunnaatilimmik iluaqutaappat? Sillimmasiinermit aamma 100 miliuunit sinnerluarlugit akiliilluta ”eqqaavugut”, tamannalu allatut aqqissuuteqqissinnaavarpuut? Ukiut tamaasa nunanut allanut niueqateqarnitsinni amingartoortuaannarpugut, aningaasallu nunatsinni kaaviaartitassaralugit kinguneqartitsinissaq nalilersorpallaarnagu avammut kiffartuussinernut assignngitsorpassuarnut akiliutigisarlugit. Apereqqitta – naak kinguneri – naak inuiaqatigiinnut iluaqutaassusai?

Aqutseriaaseqarpugut aningaasatigut annertuupilussuarmik akeqartumik. Avataaniit siunnersortiinnarnulluunniit aningaasartapiluunersui tunngavigalugit uani pisortat misissuuitsinermi aningaasartuutissatut missigersuutaat annertunerugaluunilluunniit qularinngilarput imminut akilersinnaajumaartoq. Misissuinerummi kingunerisariaqarpaa aqqissuusseqqinneq, aningaasartuutikillisaaneq, naammassisaqarsinnaassuseqarneq toqqammavigalugu. Nunani assigiinngitsuni, kingullermik Umittoormiut nunaanni (Norway) siorna naammassisaqarlutik Naammassinnaassuseqarnermik suleqatigiissitaq (produktivitetkommisjon) nalunaarusiorput iluatsilluartumik. Nunat avannarliit allat aamma taamaliortareerput, tamannalu siornamut aningasamut inatsimmik sulinitsinni uagut tungitsinniit

Naalackersuisunut kaammattuutigisaqattaarparput, unali siunnersuutitsialammut oqaaseqarnerput iluatsillugu aammaarluta qaqqeqikkusupparput.

Avataaniit isumalluuteqaannarneq malunnaatilimmik inuiaqatigiinnut killiffitsinnut naleqqussartariaqarpoq – taamaasiornermi siunissamut ileqqaarinninneruvoq.

Taama oqaaseqarluta una siunnersuut taparserparput aappasaaninginneranilu aningaasaqarnermut ataatsimiititaliamut suliarisassanngorlugu innersuullugu.

Qujanaq